

**Pravila i procedure
Razvojno-Garantnog fonda Brčko distrikta BiH
za subvencioniranje dijela kamate za kredite preduzećima i
preduzetnicima na području Brčko distrikta BiH za 2010. godinu**

Na osnovu Odluke Skupštine Brčko distrikta BiH o usvajanju Programa subvencioniranja dijela kamate za kredite preduzećima i preduzetnicima na području Brčko distrikta BiH za 2010. godinu, broj 01-02-212/10 od 14. aprila 2010. godine, a u skladu sa Odlukom o osnivanju Garantnog fonda „GFBD“ Brčko distrikta BiH, broj 01-014-010665/04 od 16.09.2004. godine, Odlukom o izmjeni i dopuni Odluke o osnivanju Garantnog fonda „GFBD“ Brčko distrikta BiH, broj 01.1-05-007952/09 od 24.07.2009. godine i Odlukom o izmjeni i dopuni Odluke o osnivanju Garantnog fonda „GFBD“ Brčko distrikta BiH, broj 01.1-05-007673/09 od 25.09.2009. godine i članom 37. Statuta Garantnog fonda „GFBD“ Brčko distrikta BiH, broj: 51/04 od 25.10.2004. godine („Službeni glasnik Brčko distrikta BiH“, broj: 04/05), Upravni odbor Razvojno-garantnog fonda Brčko distrikta BiH (u daljem tekstu: „RGFBD“) na svojoj 11.-oj sjednici, održanoj 14.05.2010. godine, donosi:

Pravila i procedure Razvojno-Garantnog fonda Brčko distrikta BiH za subvencioniranje dijela kamate za kredite preduzećima i preduzetnicima na području Brčko distrikta BiH za 2010. godinu

Član 1 (Predmet pravila i procedura)

Ovim pravilima i procedurama regulišu se: korisnici programa subvencioniranja dijela kamata, minimalni i maksimalni iznos kredita, namjena sredstava, rokovi otplate i visina subvencionirane kamatne stope, uslovi koje treba ispuniti korisnik, način podnošenja zahtjeva, procedura odobravanja i način isplate sredstava korisnicima programa.

Član 2 (Korisnici programa subvencija)

(1) Pravo na korištenje subvencije dijela kamata imaju privredni subjekti s područja Brčko distrikta BiH koji:

- imaju sjedište preduzeća, preduzetnika ili podružnice u Brčko distriktu BiH,
- su registrovani kao preduzeće, samostalni preduzetnik ili podružnica u skladu sa zakonima Brčko distrikta BiH.
- registrovanu djelatnos obavljaju na području Brčko distrikta BiH.

(2) Pravo na korištenje subvencije dijela kamata ne mogu ostvariti banke niti druge finansijske organizacije i osiguravajuća društva.

Član 3 (Minimalni i maksimalni iznos kredita)

- (1) Minimalan iznos kredita za koji će se subvencionirati dio kamata je 5.000,00 KM, a maksimalan iznos kredita za koji će se subvencionirati dio kamata je 1.500.000,00 KM.
- (2) Za preduzeća i preduzetnike iz oblasti trgovine minimalan iznos kredita za koji će se subvencionirati dio kamata je 5.000,00 KM, dok je maksimalni iznos kredita 300.000,00 KM.
- (3) U slučaju da korisnik subvencije dijela kamata na kredite realizuje kredit veći od 1.500.000,00 KM, odnosno veći od 300.000,00 KM, „RGFBD“ će subvencionirati dio kamata na iznos kredita do 1.500.000,00 KM, odnosno na iznos kredita do 300.000,00 KM, a za razliku preko ovog iznosa kredita neće se subvencionirati dio kamata.
- (4) Ukoliko jedan privredni subjekt realizuje dva ili više kredita imat će pravo na subvencioniranje dijela kamata na zbir kredita koji ne prelazi iznos od 1.500.000,00 KM, odnosno 300.000,00 KM..

Član 4 (Namjena sredstava)

- (1) Subvencionirat će se dio kamata na kredite odobrene za sve namjene, osim za one koji će biti korišteni za nabavku putničkih i terenskih vozila, koji ne služe za obavljanje registrovane djelatnosti.
- (2) Subvencionirat će se dio kamata za nabavku osnovnih sredstava putem lizinga, osim lizinga za putnička i terenska vozila, koja ne služe za obavljanje registrovane djelatnosti.
- (3) Kamata će se subvencionirati za kredite koji su odobreni putem svih banaka u Bosni i Hercegovini.
- (4) Subvencionirat će se i dio troškova na ime plaćanja profitne marže od strane korisnika bankarskih sredstava prema banci koja na takav način posluje. Trošak ne uključuje troškove obrade zahtjeva i troškove penala.

Član 5 (Rok trajanja programa i visina subvencionirane kamatne stope)

- (1) Subvencionirat će se dio kamata na odobrene komercijalne kredite sa rokom otplate do deset godina i kamatnom stopom do 13%.
- (2) Visina subvencioniranog dijela kamata za odobrene kredite iznosi 50% od ugovorene kamate.
- (3) Pravo na subvencioniranje dijela kamata imaju preduzeća, samostalni preduzetnici ili podružnice na sve kredite čiji anuiteti dopijevaju u 2010. godini, pod uslovom da su uredno vraćali kredite u prethodnom periodu.
- (4) Krajnji rok za podnošenje zahtjeva za subvencioniranje dijela kamata je 31.12.2010. godine odnosno do utroška sredstava ako se sredstva utroše prije navedenog roka.

Član 6 (Uslovi koje treba ispuniti korisnik)

- (1) Uslovi koje treba ispuniti korisnik subvencije dijela kamata na kredite su:

- a) Da je registrovan u Osnovnom sudu Brčko distrikta BiH,
- b) Da vrši namjensko ulaganje sredstava na području Brčko distrikta BiH,
- c) Da preduzeće ili preduzetnik nije pod stečajem ili likvidacijom, odnosno da nije predmetom postupka za proglašenje stečaja ili likvidacije,
- d) Da dostavi dokaze o izmirenju obaveza, sa stanjem ne starijim od 60 dana od dana podnošenja zahtjeva, izdatih od nadležnih institucija koji se odnose na izmirenje obaveza po osnovu poreza i doprinosa.

Član 7

(Način podnošenja Zahtjeva i potrebna dokumentacija)

(1) Zahtjeve za subvencioniranje dijela kamate podnose korisnici kredita Razvojno garantnom fondu u pismenoj formi na obrscu „RGFBD“.

(2) Potencijalni korisnik programa subvencioniranja za 2010-u godinu, podnosi samo jedan zahtjev za subvencioniranje dijela kamata.

(3) Za period od dana podnošenja zahtjeva pa do 31.12.2010. godine korisnici programa će naknadno „RGFBD“-u, dostavljati potvrde izdate od strane banaka o obračunatim i naplaćenim kamatama kao i potvrde o izmirenim obavezama po osnovu poreza i doprinosa, za period koji ne može biti kraći od tri mjeseca, na osnovu kojih će „RGFBD“ vršiti obračun i isplate za navedeni period.

(4) Ako podnosilac zahtjeva realizuje novi kredit u toku korištenja programa, podnosi „RGFBD“-u zahtjev za dopunu predmeta, s tim da novi kredit ne prelazi ograničenja u smislu člana 4. programa.

(5) Obrazac Zahtjeva za subvencioniranje dijela kamata po Programu Vlade Brčko distrikta BiH za 2010. godinu je dostupan na web stranici „RGFBD“ i web stranici Vlade Brčko distrikta BiH, a može se lično preuzeti i u prostorijama „RGFBD“.

(6) Uz zahtjev se prilažu sledeća dokumenta:

- a) Ugovor o kreditu sa anuitetnim planom (plan otplate kredita ili analitička kartica za revolving i slične kredite),
- b) Potvrda banke o redovnoj otplati kredita sa pregledom obračunatih i naplaćenih kamata za period za koji se vrši subvencija dijela kamate,
- c) Izvod iz sudskog registra,
- d) Obavještenje o rezvrstavanju poslovnog i drugog subjekta prema djelatnosti
- e) Dokaz o izmirenim doprinosima kod PIO, MIO,
- f) Dokaz o izmirenim doprinosima kod Fonda zdravstvenog osiguranje Brčko distrikta BiH,
- g) Dokaz o izmirenim obavezama kod Uprave za indirektno oporezivanje, (ili izjavu podnosioca da nije u sistemu PDV),
- h) Dokaz o izmirenim obavezama kod Poreske uprave Brčko distrikta BiH.

(7) Sva dokumenta se dostavljaju u originalu ili ovjerena fotokopija.

Član 8

(Procedura odobravanja)

(1) Svi podnešeni zahtjevi će po redoslijedu prijema od strane „RGFBD“ biti upisani u posebnu knjigu ulaza i istim redoslijedom će biti razmatrani od strane Upravnog odbora „RGFBD“.

(2) Direktor „RGFBD“ vrši analizu prispjelih zahtjeva (u smislu ispunjavanja traženih uslova i ispravnosti podnešene dokumentacije) i predlaže Upravnom odboru donošenje odluke.

(3) Upravni odbor „RGFBD“ razmatra prijedlog Direktora (uz svu predočenu dokumentaciju po zahtjevu) i donosi odluku o odobravanju ili ne odobravanju subvencije.

(4) Rok za razmatranje zahtjeva je petnaest (15) dana od dana podnošenja.

(5) Odluka Upravnog odbora „RGFBD“ o odobravanju ili ne odobravanju subvencije dostavlja se podnosiocu zahtjeva, a jedan primjerak se arhivira sa predmetom u „RGFBD“.

Član 9 (Pravo žalbe)

(1) Podnositelj zahtjeva ima pravo da u roku od (7) dana od dana prijema odluke podnese žalbu na odluku Upravnog odbora „RGFBD“.

(2) Žalba se podnosi pismenim putem Komisiji za žalbe „RGFBD“.

(3) Sastav Komisije za žalbe „RGFBD“ čine: Direktor „RGFBD“, Predsjednik Upravnog odbora „RGFBD“, Šef Odjeljenja za privredni razvoj, sport i kulturu, Šef Pododjeljenja za privredni razvoj i Šef Pododjeljenja za poljoprivredu.

(4) Komisija za žalbe „RGFBD“ će u roku od petnaest (15) dana razmotriti prispjelu žalbu i o tome pismeno obavijestiti podnosioca zahtjeva.

Član 10 (Način isplate sredstava korisnicima programa)

(1) Po donošenju odluke o odobravanju subvencije dijela naplaćene kamate, za period od 01.01.2010. godine do dana podnošenja zahtjeva „RGFBD“ će jednokratno, a u roku od pet (5) dana izvršiti uplatu odobrenog iznosa na račun korisnika programa.

(2) Za period od dana podnošenja zahtjeva do 31.12.2010. godine, „RGFBD“ će vršiti periodične isplate iznosa na račune korisnika programa za periode koji neće biti kraći od tri (3) mjeseca.

Član 11 (Stupanje na snagu)

Ova pravila i procedure stupaju na snagu danom donošenja i biće objavljeni na oglasnoj tabli i web stranici „RGFBD“.

Predsjednik Upravnog odbora:
Azrudin Preljević

Broj: 060/10
Brčko, 14.05.2010. godine

